

四庫全書

經部

欽定四庫全書

經部

四書通中庸卷一

詳校官給事中臣丁雲錦

刑部郎中臣許兆椿覆勘

總校官降調編修臣倉聖脉

校對官典簿臣郭祚熾

謄錄監生臣劉能

中庸朱子序

中庸何為而作也子思子憂道學之失其傳而作也

曰通

道統之傳朱子獨於中庸言之何也朱子嘗曰聖人之  
道所以異乎老釋之徒者以其精粗隱微體用渾然莫  
非大中至正之矩而無偏倚過不及之差聖賢相傳只  
是一中字自堯舜以及三代之隆斯道如日中天魑魅  
無所容迹未聞有異端之說中庸可無作也至孔子時  
始曰攻乎異端然其說猶未敢盛行至子思時則有可  
憂者矣憂異端之得肆其說

蓋自上古聖神繼天立極

而道統之傳有自來矣

王氏曰道統二字未有人提出說得如此的確昌黎略及之亦

是虛說而已

其見於經則允執厥中者堯之所以授舜也人

心惟危道心惟微惟精惟一允執厥中者舜之所以授禹也堯之一言至矣盡矣而舜復益之以三言者則所以明夫堯之一言必如是而後可庶幾也

語錄中只是箇恰好底道理

理允是真箇執得堯當時告舜只一句舜已曉得所以不復更說舜告禹又添三句說得又較仔細這三句是允執厥中以前事是舜教禹做工夫處便是怕禹尚未曉得故恁地說○舜禹相傳只就這心上理會也只在日用動靜之間求之不是去虛空中討一箇物事來○只是一箇心有道理底人心即是道心○黃氏曰人指此身而言道指此理而言發於此身者喜怒哀樂是也發於此理者仁義禮智是也○勿齋程氏曰人生而靜氣未用事未有人與道之分但謂之心而已感物而動始有人心道心之分焉精一執中皆是動時工夫○通

曰六經言道統之傳自虞書始不有論語表出堯曰允  
執厥中則後世孰知舜之三言所以明堯之一言哉論  
語執中字朱子無明釋至孟子湯執中始釋之曰守而  
不失意可見矣然畢竟謂之執者自後世論堯之聖不  
可以賢者之固執例論自堯之心推之則聖不自聖只  
此執字愈見堯之所以為聖爾況中無定形儻不言執  
人將視之如風如影無可捕詰矣然執之工夫只在精  
一上堯授舜曰允執厥中如夫子語曾子以一貫舜授  
禹必由精一而後執中是猶曾子告門人必由忠恕而達於一貫也

**蓋嘗論之心之虛靈**  
知覺一而已矣

○語錄所以覺者心之理能覺者氣之靈  
○陳氏曰人得天地之理為性得天地  
之氣為體理與氣合方成箇心有箇虛靈知覺便是身  
之所以為主宰處○勿齋程氏曰虛靈心之體知覺心  
之用○趙氏曰知是識其

所當然覺是悟其所以然

**而以為有人心道心之異者**

則以其或生於形氣之私或原於性命之正

語錄天生此民時已

是命他以此性了形氣是口鼻耳目四肢之屬未可便謂之私欲但此數件事屬之自家便是私有底物不此道便公共○真氏曰私猶言我之所獨耳今人言私親私恩之類或問六經中曾有謂私非惡者否曰遂及我私言私其縱如此類以惡言之可乎○通曰須看生字與原字生是氣已用事時原是從大本上說就氣之中指其不雜

而所以為知覺者不同

語錄只是這一箇心知覺從耳目上去便

是人心知覺從義理上去便是道心○通曰前言虛靈知覺兼體用言此獨言知覺專以用言虛靈同知覺異須看所以兩字或生於形氣之私所以或從氣上知覺或原於性命之正所以或從理上知覺

危殆而不安或微妙而難見耳

語錄危未便是不好只是危險在欲墮未墮之

間耳微者難明有時發見此子使自家見得有時又不見了○陳氏曰人心方是就此軀殼上平說未是不好底物但此心最艱脆不安易流於不好故謂之危如飢思食渴思飲此由形體而發人心也因而飲食未害也若窮口腹之欲便陷矣道心專是就義理上說但此心本無形狀至幽微而難見故謂之微如疇爾蹴爾嗟來等食皆不肯食此由義理而發道心也若其嗟也可去其謝也可食則於理甚隱至為難知非賢哲莫能識之○通曰心一而已而曰人心道心心豈有二哉堯曰執中是已發之中故舜明執中之旨亦只就心之發處言之本只是一箇心自形氣上發出則謂之人心自義理上發出則謂之道心朱子以前多便指人心為人欲殊不知氣以成形是之謂人理亦付焉是之謂道非人無以載此道故言道心必先言人心非道則其為人也不過血氣之軀爾故言人心必言道心如飲食男女人心也飲食男女之得其正即道心也故其發也微而不安而

發之正者又微而難見實非有兩心也

然人莫不有是形故雖上智不能

無人心亦莫不有是性故雖下愚不能無道心

語錄問上智何

以更有人心曰人自有人心道心饑寒痛痒此入心也  
惻隱羞惡辭讓是非此道心也雖上智亦同○通曰上  
文曰形氣之私此但曰形蓋氣在天而人得之以成形  
故言形不必言氣上文曰性命之正此但曰性蓋命在  
天而人稟之以成性  
故言性不必言命二者雜於方寸之間而不知所以

治之則危者愈危微者愈微而天理之公卒無以勝夫

人欲之私矣

陳氏曰二者在方寸間本自不相紊亂○  
又曰二者無日無時不發見呈露非是判

然為二物不相交涉只在人識別之○定宇陳氏曰危  
愈危流於惡微愈微幾於無○通曰人心未便是人欲



到不知所以治之方說得人欲上文形氣之私與性命之正對言那私字未便是不好此曰人欲之私與天理之公對言

精則察夫二者之間而不雜也一則

守其本心之正而不離也

通曰此一間字朱子喫緊教人處孟子曰利與義之

間其所謂間者猶易剖析此所謂二者之間方雜於寸非精以察之不可也本心之正即上文所謂原於性命之正朱子嘗曰中庸一書本只是隨時之中其所以有隨時之中者是緣有那未發之中在致於此論其發而為道心者亦必原其未發而為性命之正者蓋其本也真而靜其未發也五性具焉此所謂性命之正也即吾本心之正也形既生矣外物觸其形而動於中矣於是其發也始有人心道心之異能一於道心是即守其本心之正而不離也

從事於斯無少間斷必使道心

常為一身之主而人心每聽命焉

語錄問人心可無否曰如何無得但

以道心為主而人心每聽道心之區處方可

則危者安微者著而動靜云

為自無過不及之差矣

文集不待擇於過不及之間而自然無不中矣○陳氏曰

如此則日用之間無往而非中凡聲之所發便合律身之所行便合度凡由人心而出者莫非道心之流行○通曰人心本危能收斂入來則危者安道心本微能克拓出去則微者著然功夫惟在精一論語博文約禮大學致知誠意孟子知天事天中庸擇善固執皆是也以此見中如何執只精一便是執之工夫所以求子於此亦不復釋執字也然朱子雖不以守字釋此執字却曰一則守其本心之正而不離於此下一守字最見得執中之功全在於惟一夫堯舜禹天下之大

聖也以天下相傳天下之大事也以天下之大聖行天

下之大事而其授受之際丁寧告戒不過如此則天下

之理豈有加於此哉

陳氏曰此是大綱目處堯舜禹之所以傳受天下皆是此道理○通

曰天下之理豈有加於此者中之一字聖聖相傳之道莫加於此也精一二字聖聖相傳之學莫加於此也

自是以來聖聖相承若成湯文武之為君臯陶伊傅周

召之為臣既皆以此而接夫道統之傳

王氏曰三代道統兩句東定

若吾夫子則雖不得其位而所以繼往聖開來學其功

反有賢於堯舜者

孟子集註堯舜治天下夫子又推其道以垂教萬世堯舜之道非得孔子

則後世亦何所據哉○王氏曰世變日降道統在下故此以後敎孔門一泐道統○通曰未論六經之功有賢於堯舜只如此執中一語夫子不於論語之終發之孰知其為堯之言不於堯曰執中之後而繼之湯武誓師之意與其施於政事者又孰知夫堯舜之授受者此中而湯武之征伐者亦此中也哉姑即一節言之其功賢於堯舜然當是時見而知之者惟顏氏曾氏之傳得其

宗

饒氏曰朱子大學中庸序文皆說曾氏之傳得其宗大學之宗在首章中庸之宗在惟精惟一允執厥中

道以中庸為準的然却要明而誠之中庸是道明誠是學精即明一即誠○通曰夫子以前傳道統者皆得君師之位而斯道以行夫子以後傳道統者皆不得君師之位而斯道以明故明堯舜禹湯文武之道者夫子六經之功而明夫子之道者曾子大學子思中庸之功也

及曾氏之再傳而復得夫

子之孫子思則去聖遠而異端起矣子思懼夫愈久而愈失其真也於是推本堯舜以來相傳之意質以平日所聞父師之言更互演繹作為此書以詔後之學者蓋

其憂之也深故其言之也切其慮之也遠故其說之也

詳

通曰去聖遠而異端起此子思所深憂也既曰憂之深又曰慮之遠似為重複切謂前有千載不傳之緒

故憂之也深後有異端似是而非故其慮之也遠言之也切道莫切於中學莫切於精一說之也詳則三十三章可謂

詳矣

其曰天命率性則道心之謂也

語錄性是心之道理○通曰性

是心未發時此理具於此心道心是心發時此心合乎此理

其曰擇善固執則精一

之謂也

語錄擇善即惟精固執即惟一○通曰擇善固執是論賢者之學精一是兼論聖賢之學

其

曰君子時中則執中之謂也

語錄時中是無過不及底中執中亦然○通曰執中

二字堯言之時中二字至孔子始言之道不合乎中異端之道非堯舜之道中不合乎時子莫之執中非堯舜

之執世之相後千有餘年而其言之不異如合符節歷

選前聖之書所以提挈綱維開示蘊奧未有若是其明

且盡者也

通曰提挈綱維舉其大者而小者不能遺開示蘊奧闡其幽者而顯者不能外此八字得

中庸一書之大槩矣自是而又再傳以得孟氏為能推明是書以

承先聖之統

趙氏曰中庸深處多見於孟子如道性善原於天命之謂性也存心收放心致中也

擴充其仁義之心致和也誠者天之道思誠者入之  
道一章其義悉本於中庸尤足以見淵源之所自 及

其沒而遂失其傳焉則吾道之所寄不越乎言語文字  
之間而異端之說日新月盛以至於老佛之徒出則彌

近理而大亂真矣

語錄便是他那道理也有極相似處  
只是說得來別須是看得他那彌近

理而大亂真處始得○陳氏曰彌近理而大亂真甚相  
似而絕不同也然非物格知至理明義精者不足以識

破

然而尚幸此書之不泯故程夫子兄弟者出得有所  
考以續夫千載不傳之緒得有所據以斥夫二家似是  
之非蓋子思之功於是為大而微程夫子則亦莫能因

其語而得其心也

通曰微程子莫能因子思之語而得子思之心微朱子莫能析衷程門諸

子之說而得程子之心

惜乎其所以為說者不傳而凡石氏之所

輯錄僅出於其門人之所記是以大義雖明而微言未

析至其門人所自為說則雖頗詳盡而多所發明然倍

其師說而淫於老佛者亦有之矣

文集明道不及為書世傳陳忠肅公所序

者乃呂氏所著別本也伊川雖嘗言中庸已成書然亦不傳於學者或以問和靖尹公則曰先生自以不滿其意而火之矣二夫子既皆無書故今所傳特出於門人記其平居問答之辭惟呂氏游氏楊氏侯氏為有成書若謝氏尹氏則亦或記其語之及此者耳又皆別自為編或頗雜出他記

熹自蚤歲即嘗受



讀而竊疑之沈潛反復益亦有年一旦恍然似有以得其要領者然後乃敢會衆說而折其衷既為定著章句一篇以俟後之君子而一二同志復取石氏書刪其繁

亂名以輯略且記所嘗論辯取舍之意別為或問以附

其後

衛氏曰按中庸一篇會稽石氏集解自濂溪先生而下凡十家文公嘗為之序已而自著章句以十

家之說刪成輯略別著或問以開曉後學

然後此書之旨支分節解脈絡貫

通詳畧相因巨細畢舉而凡諸說之同異得失亦得以

曲暢旁通而各極其趣雖於道統之傳不敢妄議

通曰孟子末章

若不敢自謂已得道統之傳而實有不得辭者朱子此語亦然然初學之士或有取焉

則亦庶乎行遠升高之一助云爾

程子曰中庸一卷書自言理便推之於事

如國家有九經及歷代聖人之迹莫非實學也如登九重之臺自下而上為是○通曰中庸一書言天理處雖若至高至遠中間說人事未嘗無自下升高自通行遠之功夫故朱子以其章句為行遠升高之一助○大學言心不言性故朱子於序言性詳焉  
中庸言性不言心故此序言心詳焉

戊申新安朱熹序

淳熙己酉春三月

欽定四庫全書

中庸通卷一

元 胡炳文 撰

朱子章句

中者不偏不倚無過不及之名庸平常也

語錄名篇本取時中

之中然所以能時中者蓋有未發之中在所以先說未發之中然後說君子之時中○在中之義是言在裏面底道理非以在中釋中字○在中者未動時恰好處纔發時不偏於喜則偏於怒不得謂之在中矣○不偏者明道體之自然即無所倚着之意不倚則以人而言乃見其不倚於物耳○陳氏曰庸只是日用平常之道如君臣之義父子之親夫婦之別長幼之序朋友之信凡日用間常行而不可廢者便是平

常道理又曰程子以不易解庸字亦是謂萬古常然而不可易但其義未盡不若平常字親切可包不易字蓋天下事物之理惟平常然後可以不易若怪異之事可暫而不可常佛老說道理便入於高遠玄妙不知自堯舜三代以來只是一箇平常道理所以萬世常然而不可易平常不易本作一意看○通曰朱子於語孟釋中字但曰無過不及以中之用言中庸有所謂未發之中故添不偏不倚四字兼中之體用言不偏不倚本程子無過不及本呂氏庸平常也是自朱子發出蓋雖堯舜之禪讓湯武之征伐只是此中則亦只是此平常之理也

子程子曰不偏之謂中不易之謂庸中者天下之正

道庸者天下之定理

語錄問正道定理恐道是總括之名理是道裏而有許多條目

曰緊要在正字定字上中只是箇恰好道理為見不  
得是亘古今不可變易底故更着箇庸字○通曰朱  
子曰有中而後有庸以程子所釋觀之不偏所以不  
易天下之正道即所以為天下之定理亦非有二也  
此篇乃孔門傳授心法

陳氏曰卑不失之汙賤高不  
溺於空虛蓋真孔門傳授心

法

子思恐其久而差也故筆之於書以授孟子其書

始言一理中散為萬事末復合為一理放之則彌六

合卷之則退藏於密其味無窮皆實學也善讀者玩

索而有得焉則終身用之有不能盡者矣

語錄始合  
為一理指

天命之謂性言末復合為一理指無聲無臭言始合  
而開其開也有漸不開而合其合也亦有漸○中散為

萬事如知仁勇許多為學底道理與為天下國家有九經與祭祀鬼神許多事中間無些子罅隙句句是實○饒氏曰中庸當作六大節看首章是一節自君子中庸以下十章是一節君子之道費而隱以下八章是一節哀公問政以下七章是一節大哉聖人之道以下六章是一節末章是一節第一節說中和第二節說中庸第三節說費隱第四節說誠第五節說大德小德第六節復申首章之要意之中間却是兩次開闔自中和而中庸以至費隱是放開說自費隱而誠是收斂說自誠而推至道至德又是放之以至於極自至道至德而歸之無聲無臭又是斂之以至於極○通曰中庸全體大用之書首言一理中散為萬事是由體之一而達於用之殊末復合為一理是由用之殊而歸於體之一放之則彌六合感而遂通天下之故心之用也卷之則退藏於密寂然不動心之體也此乃孔門傳授心法故於心之體用備焉其

用無窮終身用之不能  
盡用如此體可知矣

天命之謂性率性之謂道修道之謂教

命猶令也性即理也天以陰陽五行化生萬物氣以  
成形而理亦賦焉猶命令也於是人物之生因各得  
其所賦之理以為健順五常之德所謂性也

語錄天命之謂

性是就人身中指這箇是天命之性不雜氣稟而言是專言理若云兼言氣便說率性之謂道不去如太極不離乎陰陽而亦不雜乎陰陽也○仁義禮知雖尋常昆蟲之類皆有之如牛之性順馬之性健即健順之性也只稟得來少不似人稟得來全耳○陳氏曰性即理也何以不謂之理而謂之性蓋理是泛

言天地間公共之理性是在我之理○真氏曰自昔  
言性者曰五常而已朱子乃益之以健順蓋陽之性  
健木火屬焉在人為仁禮陰之性順金水屬焉在人  
為義智土則二氣之沖和性亦兼乎健順陰陽不在  
五行之外健順亦豈在五行之外乎○東窓李氏曰  
仁之油然而生意不可遏禮之粲然明盛不可亂健之  
為也義不拂乎可否之宜知不外夫是非之別順之  
為也若夫信則體是理而不易者健也循是理而無  
違者順也○方氏曰問天命之謂性朱子如何兼人  
物言曰人物皆只同一箇天原頭所以聖人盡己性  
則能盡物性由其一原也此是從周子太極圖說來  
周子以前未有人說到此○通曰孟子性善之論自  
子思此首一句來然須看開端一天字程子曰中庸  
始言一理末復合為一理所謂一理者即此一天字  
又曰萬物各具一理萬理同出一原所謂一原者即  
此一天字按朱子曰穀梁言天不以地對所謂天者



理而已成湯所謂上帝降衷子思所謂天命之性是也。是為陰陽之本而其兩端循環不已者為之化焉。又按致堂胡氏曰自賦予而言曰天命自稟受而言曰天性自流行不息而言曰天道自道中條理而言曰天理自主宰而言曰天心自徧覆而言曰天體自晷度而言曰天文自可推而言曰天數自甚美而言曰天休自可法而言曰天則自感應而言曰天變自不可犯而言曰天威宇宙間無有一能外於天者。子思所謂性道教亦無有一不本於天者。學者能知此身此心所自來者皆天也。其學自不能已矣。 **率**

**循也道猶路也人物各循其性之自然則其日用事**

**物之間莫不各有當行之路是則所謂道也。**語錄率性之謂

道非人率之也伊川解率字只訓循蓋曰循萬物自然之性之謂道此率字不是用力字伊川謂便是仁

者人也合而言之道也呂氏說以人行道若然則未  
行之前便不是道乎○人與物之性皆同循人之性  
則為入之道循牛馬之性則為牛馬之道若不循其  
性使馬耕牛馳則失其性非牛馬之道矣○道即性  
性即道固是一物然須看因甚喚做性因甚喚做道  
○性是箇渾淪底道是箇性中分派條理○陳氏曰  
率循即隨也率字就道上說非就行道上說若把做  
率性而行是人為之後方有道非本然有是道也○  
如隨物之性則牛可耕馬可乘雞可司晨犬可司夜  
其所發皆有自然之理如隨草木之性則桑麻可衣  
穀粟可食春宜耕夏宜耘秋宜穫凡物皆有自然之  
理○真氏曰集註生之謂性章深言人物之異此章  
乃兼人物而言生之謂性以氣言天命之謂性以理  
言以氣言則人物所稟不同以理言則天之所命一而  
已矣然則虎狼之搏噬牛馬之踉蹠則氣稟之所為  
而非天命之本然矣豈獨物為然凡人之為善者皆

循天命之性也而為不善則發乎氣稟之性矣以是而觀則此章兼人物而言尚何疑哉○饒氏曰率性之謂道一語專為訓道名義蓋世之言道者高則入於荒唐以為無端倪之可測識老莊之論是也卑則滯於形器以為是人力之所安排告荀之見是也是以子思於此首指其名義以示人言道者非他循性之謂也○通曰易曰一陰一陽之謂道繼之者善也成之者性也子思之論蓋本於此但易先言道而後言性此道字是統體一太極子思先言性而後言道此道字是各具一太極章句本古註率循也論語足踏踏如有循循謂足不離地也此訓循謂道不離性離性即非道也後學說此一字便易涉於人為嗚呼必入為而後謂之道不有人為獨無道乎朱子之訓釋如此而學者往往多誤不可不察

修品節

之也性道雖同而氣稟或異故不能無過不及之差

聖人因人物之所當行者而品節之以為法於天下

則謂之教若禮樂刑政之屬是也

語錄修道之謂教專就人事上言然

就物上亦有品節如周禮掌獸掌山澤各有官周公驅虎豹犀象草木零落然後入山林昆蟲未蟄不以火佃之類各有品節使萬物各得其所亦所謂教也○黃氏曰修道二字須自道上及人氣稟上兼看如孝是事父之道然孝之中有多少曲折人氣稟不同柔若過於和剛者過於嚴則於孝必有不中節者此禮樂刑政所以著為品節使之盡其道也○潘氏曰品節云者如親親之殺尊賢之等隨其厚薄輕重而為之制以矯其過不及之偏者也雖若出於人為而實原於性命之正○通曰章句謂禮樂刑政之屬統氏改云五典三物與夫小學大學之法謂刑政屬政而非教禮樂二字屬教而包括不盡妄意禮樂二字

在三物中說得小不過禮樂之文而已自是包括不盡若曰天高地下萬物散殊而禮制行矣流而不息合同而化而樂興焉此禮樂二字天下之理皆該在其中禮只是一箇序樂只是一箇和如所謂五典三物小學大學之法此數者一不得其序則非禮一不得其和則非樂矣若曰刑政屬政而非教分而言之則政自是政教自是教合而言之古者刑政無非教也曰禮樂又曰刑政本末兼舉精粗不遺況曰禮樂刑政之屬所包者廣恐未易輕改也況朱子釋修道謂因人物所當行者而品節之故禮樂刑政之教兼人物言饒氏所謂五典三物小學大學可施於人而不可施於物故不可不辨

蓋人之所以

為人道之所以為道聖人之所以為教原其所自無一不本於天而備於我學者知之則其於學知所用

力而自不能已矣故子思於此首發明之讀者宜深

體而默識

音也

語錄

此三句乃天地之大本大根

萬化皆從此出人若能體察方見

聖賢所說道理皆從自己胸中流出不假他求

○方

氏曰子思說箇天命謂性率性謂道修道謂教三句

是因甚如此說只為人不知軀殼之所從來其軀殼

中有許大物事不曾識得體得故直從天地萬物之

大本大原說將來夫人有此身便有所以為人之理

與生俱生乃天之所賦而非人力所能為也所以凡

為人者皆當講明此理而謹守之不得昏棄者為此

○北山陳氏曰此章蓋中庸之綱領此三句又一章

之綱領聖賢教人必先使之知所自來而後有用力

之地此三句蓋與孟子言性善同意○饒氏曰性道

教道字重中庸一書大抵是說道性原於天而流行

於事物則謂之道修此道而教人則謂之教所以以下

文便說道也。若如君子之道費而隱，大哉聖人之道，皆是提起道字說。以此見重在道字。○王氏曰：一篇書皆是言道之體。用第一句「天是體性」，是用第二句「性是體道」，是用第三句「道是體教」。是用章句人之所以為人，以下總說大原頭。以「人字換性字」，極有力。○通曰：中庸開端此三語，雖不露出中字，天命謂性，即未發之中，因率性之道，而品節之，即時中之中，或疑此二句不必兼人物言，殊不知自大本大原上說來，大化流行，何嘗分人是物，但其性道雖同，而人與物之氣稟有異，所以有全有偏。人雖同此性道之全，而又自不無氣稟之異，於是有所不及。此所以不可無聖人修道之教。然章句始雖兼人物而言，末則不曰性之所以為性，乃曰人之所以為人，提起一人字，殊有深意。蓋性道教名，若有異，其所以然者皆天也。天具於人，人即是天。如之何可自棄其天，而自失其所，以為人哉。人能體察乎此，則其於學也，如之何不自

用其  
力哉

道也者不可須臾離也可離非道也是故君子戒慎乎

其所不睹恐懼乎其所不聞

離去  
聲

道者日用事物當行之理皆性之德而具於心無物  
不有無時不然所以不可須臾離也若其可離則為

外物而非道矣

語錄問道不可須臾離只言我不可  
離這道亦還是道有不能離底意思

曰道是不可離底純說是不能離不成錯行也是道  
○王氏曰提道也者三字起下面分作兩項工夫朱  
子看得最密又曰章句性之德而具於心一句最要  
看○潘氏曰未發之前固未有人欲之私可言所以



朱子特謂之外物。○陳氏曰：道是日用事物所當行之路，即率性之謂，而得於天之所命者，而其總會於吾心大，而父子君臣夫婦長幼朋友微而起居飲食蓋無物不有，自古及今流行乎天地間，蓋無時不然。○定宇陳氏曰：無物不有，言大無時不然，言久。○通曰：按饒氏云：不可須臾離，只是說無時不然，至費隱章鳶飛魚躍，方有無物不有底意思。章句是攙先說了竊意，此道字必須說從性上來，天命之性無物不有，所以率性之道無時不然。朱子說富有日新，亦云先說富有方始說得日新，此與說宇宙相似，先是有這物事了，方始相連相續去。是以君子之心常存敬畏，雖不見聞

亦不敢忽，所以存天理之本然而不使離於須臾之

頃也。

語錄戒慎恐懼不須說得太重，此只是略略收拾來，便在這裏。伊川所謂道箇敬字也不大段

用得力孟子曰操則存操字亦不是着力把持所不睹所不聞不是閉耳合眼時只是萬事皆未萌芽自家便先恁地戒慎恐懼不睹不聞之時便是喜怒哀樂未發處常要提起此心在這裏防於未然所謂不見是圖也○饒氏曰君子之心常存敬畏雖當事物既往思慮未萌目無所睹耳無所聞暫焉之頃亦不敢忽事物既往是指前面底說思慮未萌是指後面底說不睹不聞正在此二者之間看上文道不可須臾離則是自所睹以至於所不睹自所聞以至於所不聞皆當戒懼而此不睹不聞在事物既往之後看下文喜怒哀樂未發則此不睹不聞又在思慮未萌之前故須看此二句方說得上下文意貫串緊要在須臾之頃四字於此見得子思所以發須臾兩字之意○子思不說未睹未聞而曰不睹不聞不字與未字不同未睹未聞是指事未至之前而言不睹不聞是指事已往之後而言指事未至之前而言是內靜

處說向動處去指事已往之後而言是由動處說入靜處來君子於日用應事接物之際隨處操存到得事物既往若無所用其戒懼之心猶不敢忘是用工最密處章句曰君子之心常存敬畏雖不見聞亦不敢忽當觀常字亦字見得動處做工夫到靜時亦不敢忽也

莫見乎隱莫顯乎微故君子慎其獨也

見音現

隱暗處也微細事也獨者人所不知而已所獨知之地也言幽暗之中細微之事跡雖未形而幾則已動人雖不知而已獨知之則是天下之事無有著見明

顯而過於此者

方氏曰戒懼是保守天理慎獨是檢防人欲戒懼是統體做工夫慎獨是

又於萌動處加工夫其所不睹不聞其字便是指己之不睹聞處○北山陳氏曰曰隱曰微則此念已萌矣特人未知隱而未見微而未顯耳然人雖未知而我已知之則固已甚見而甚微耳此正善惡之幾也○潘氏曰幽暗之中細微之事其是非善惡皆不能逃乎此心之靈所以當此之時尤為昭灼顯著也若其發之既遠為之既力則在他人十目所視十手所指雖其昭灼而在我者心意方注於事為精神方運於酬酢其是非得失反有不自覺者矣○饒氏曰此又對上文而言隱暗之地雖人之所不睹微密之事雖人之所不聞然其幾既動則必將呈露於外而不可掩昭晰於中而不可欺是道固不可須臾離而其形見明顯尤莫有甚於此者是以君子既常戒懼而於此尤加謹焉所以遏人欲於將萌而不使其滋長於隱微之中以

至離道之遠也

語錄慎獨是從見聞處至不睹不聞處皆戒謹恐懼又從其中於獨處更

加謹也是無所不謹而謹處更加謹也○道不可離言道之至廣至大者莫見乎隱莫顯乎微言道之至精至密者○道不可須臾離是說不可不存養是故以下是教人戒懼做存養工夫莫見乎隱莫顯乎微是說不可不省察故君子以下是教人謹獨察私意起處防之只看兩故字可見○既言道不可離只是精粗隱顯之間皆不可離故言戒懼不睹不聞以該之若曰自其思慮未起之時早已戒懼非謂不戒懼乎所睹所聞而只戒懼乎不睹不聞也此兩句是結上文不可須臾離一節意下文又提起說無不戒懼之中隱微之間念慮之萌不可忽故又欲於其獨而謹之又結上文隱微意○如此分兩節工夫則致中和方有着落而天地位萬物育亦各有歸着○問上節能存天理了則下面謹獨似多了一截曰雖是存

得天理臨發時也須檢點這便是他密處○戒懼是由外言之以盡乎內謹獨是由內言之以及乎外○自所睹所聞以至於不睹不聞自發於心以至於見於事如此方說得不可須臾離出○陳氏曰雖是平常已嘗戒懼至此又當十分加謹纔加謹則所發便都是善不加懼則所發便流於惡去也○熊氏曰按大學誠意章言慎獨子思傳授蓋本於此○饒氏曰不睹是意未萌時不聞是言未發時意未萌時自家亦無所見言未發時自家亦無所聞到意已萌言已發時人雖不見而已所獨見人雖不聞而已所獨聞故於此必慎其獨以此觀之不睹不聞與獨睹獨聞皆是指裏而底說朱子敬齋箴其說亦然防意如城是戒懼於意未萌之時守口如瓶是恐懼於言未發之時○戒慎恐懼便是慎獨之慎詳言之則曰戒慎恐懼約言之只是慎之一字○中庸言戒懼不睹不聞與慎其獨大學只言慎其獨不言戒懼不睹不聞

初學之士且令於動處做工夫○存養省察是四件事  
存謂存其心養謂養其性省謂省諸身察謂察於事  
當為之箴存箴曰心本至靈放之則昏故以操之無  
適不存養箴曰性本天賦在得其養根本常固萌孽  
漸長省箴曰孰無過差所貴內省時一警持邪偽斯  
屏察箴曰在物為理處物為義精以察之無俾或戾  
○通曰三句重在一道字天命謂性是道之體修道  
謂教是道之用所以於此獨提起道也者三字下文  
却分為兩節言之道也者不可須臾離所以君子必  
戒慎所不睹恐懼所不聞不睹不聞四字正是釋須  
臾二字人有目豈不睹有耳豈不聞不睹不聞特須  
臾之項爾道也者莫見乎隱莫顯乎微所以君子必  
慎其獨此一獨字正是說上文隱微二字隱微却是  
人之所不睹不聞而我所獨睹獨聞之時之處也章  
句於大學慎獨曰審其幾此曰幾則已動一幾字是  
喫緊為人處上文曰君子之心常存敬畏一敬字是

敬人用工夫處戒懼不睹不聞是幾未動而敬慎獨則幾已動而敬也曰常存敬畏雖不見聞亦不敢忽當看常字與亦字曰君子既常戒懼而於此尤加謹焉當看常字與尤字存天理之本然過人欲於將萌當看存字與過字然皆不離乎敬而已大抵君子之心常存此敬不睹不聞時亦敬獨時尤敬所以未發時渾是本然之天理此敬足以存之纔發時便有將萌之人欲此敬足以遏之也未子敬齋箴與此無不合戒懼是靜而敬慎獨是動而敬戒懼是惟恐須臾之有間慎獨是惟恐毫釐之有差

喜怒哀樂之未發謂之中發而皆中節謂之和中也者

天下之大本也和也者天下之達道也

樂音洛中節之中去聲

喜怒哀樂情也其未發則性也無所偏倚故謂之中



發皆中節情之正也無所乖戾故謂之和大本者  
天命之性天下之理皆由此出道之體也達道者循  
性之謂天下古今之所共由道之用也此言性情之

德以明道不可離之意

語錄喜怒哀樂未發如處室  
中東西南北未有定向不偏

於一方只在中間所謂中也及其既發如已出門東  
者不能復西南者不能復北然各因其事無所乖逆  
所謂和也○問蘇李明問伊川喜怒哀樂之前下靜  
字下動字伊川曰謂之靜則可靜中須有物始得先  
生曰靜中有物者只是知覺便是又問伊川却云纔  
說知覺便是動曰今未曾知覺甚事但有知覺在何  
嫌其為靜不成靜坐只瞌瞌睡如喜而中節便是倚  
於喜矣但在喜之中無過不及故謂之和○未發性

也已發情也子思欲學者於此識得心也心也者其妙性情之德也歟○陳氏曰節者限制也其人情之準的乎只是得其當然之理無此過不及與是理不相拂戾故名之曰和○袁氏曰喜怒哀樂未發則渾然在中及發則有中節有不中節而惟中節者為和○饒氏曰四者件件中節方可謂之和譬之四時春溫而夏熱秋涼而冬寒方可謂之和三時得宜一時失宜亦不得謂之和矣節如竹節之節限止之義也喜怒哀樂之發患其過不患其不及故以節言之○王氏曰中節二字便代了無過不及四字○通曰上文說君子主敬之功見人心之於道不可離此說在人性情之德又見道之在人心本不可離自堯舜以至夫子所謂中者只說已發之中而子思獨提起未發之中言之是謂人之本心如文王周公皆說畫後之易而夫子曰易有太極則畫前元有之易也大哉斯言真足以發千古之秘矣發而中節之和即是無

過不及之中故周子曰中也者和也中節也天下之  
達道也達道即前所謂率性之道前言率性之道必  
自天命上說來此言達道必自大本  
說來體用一源非知道者孰能識之

### 致中和天地位焉萬物育焉

致推而極之也

語錄致者推至其極之  
謂凡言致者皆是此意

位者安其所

也育者遂其生也自戒懼而約之以至於至靜之中  
無少偏倚而其守不失則極其中而天地位矣自謹

獨而精之以至於應物之處無少差謬而無適不然

則極其和而萬物育矣

黃氏曰章句無少偏倚無少  
差謬是橫致一致其守不失

無適不然是直致一致橫致如一箇物打迸了四圍  
恁地潔淨相似直致則是今日如此潔淨後日亦如  
此以至無頃刻不如此○新定顧氏曰天地定位萬  
物並育亦唯本於此中達於此和故非此中非此和  
天地無由而位萬物無由而育奚以知其然邪天地  
之所自出萬物之所自來惟此中也天地之所以順  
動萬物之所以化生惟此和也故舍中和則無以為  
天地萬物矣惟中和之極至乃至於此學者可不從  
事於此邪○饒氏曰致中和而能使天地位萬物育  
者是有此理也然其所居之位有高下則其力之所  
極有廣狹如為一家之主則能使一家之天地位萬  
物育為一國之主則能使一國之天地位萬物育為  
天下之主則能使天地位萬物育父子兄弟  
弟夫婦婦此一家之天地位也妻子臣妾人人各  
得其所此一家之萬物育也一國亦然極其至於天  
下然後天地位萬物育始充其量譬如一日復禮天

下歸仁使其如湯之有七十里文王之有百里則其  
朝諸侯有天下也必矣顏子居陋巷何緣能使天下  
歸之然當時同門之人心悅誠服萬世之下皆崇仰  
之非天下歸仁而何又如夫子在當時雖不見位育  
極功然其道明於萬世能使三綱五常終古不墜是  
即位育之極功也○通曰章句精之約之四字只是  
釋一致字約之則存養之功益密精之則省察之功  
益嚴至靜之中無少偏倚已至約之至而其守不  
失所以約之者愈至應物之處無少差謬已是精之  
之至而無適不然所以精之者愈至此之謂中和之  
也致蓋天地萬物本吾一體吾之心正則天地之心亦  
正矣吾之氣順則天地之氣亦順矣故其效驗至於  
如此此學問之極功聖人之能事初非有待於外而

修道之教亦在其中矣

語錄尊卑上下之大分即吾心之天地也應變曲折之萬

端即吾身之萬物也○真氏曰致中和自然天地位萬物育如箕子洪範所謂肅又哲謀聖而雨暘燠寒風應之董仲舒所謂人君正心以正朝廷正百官正萬民則陰陽和風雨時諸福百物莫不畢至皆是此理○王氏曰形聲氣和之應漢儒亦有此說而不知其本同一體也○通曰或疑致吾之中如何天地便位致吾之和如何萬物便育蓋不知天地萬物本吾一體故也朱子此八字是從天命之性說來性一而已天地萬物與吾有二手哉

是其一體一用雖有動靜之殊然必

其體立而後用有以行則其實亦非有兩事也故於

此合而言之以結上文之意

王氏曰體立用行轉一語甚力有以字意深○

通曰中和二字雖有體用動靜之殊然深觀其所從來則天地所以位萬物所以育有不得而析者故朱子於此又合而言之曰必其體立而後用有以行亦非有兩事也中庸一書本只言率性之道而必推原天命之性本只言時中之中而必推原未發之中皆謂體立而後用有以行也嗚呼天地未嘗不位也萬物未嘗不育也人之心本未嘗不中也體用一原非知道者孰能識之

右第一章子思述所傳之意以立言首明道之本原出於天而不可易其實體備於已而不可離次言存養省察之要終言聖神功化之極蓋欲學者於此反求諸身而自得之以去夫外誘

之私而充其本然之善楊氏所謂一篇之體要  
是也其下十章蓋子思引夫子之言以終此章

之通曰本然之善是天命之性外誘之私非率  
性之道存養是存本然之善省察是防外誘  
之私至於能去夫外誘之私而充其本然之善  
不過能復夫天命之性而已中庸約之凡六大

節此為  
第一節

仲尼曰君子中庸小人反中庸

中庸者不偏不倚無過不及而平常之理乃天命所  
當然精微之極致也唯君子為能體之小人反是

陳氏



曰中庸只一箇道理所以不析開說○饒氏曰中庸者道之準的古今聖賢所傳只是此理子思之作此書亦只為發明此二字首章中和特推其所自來耳○通曰第二章以下十章皆述夫子之說獨此章與第三十章揭仲尼二字仲尼曰仲尼之言也所言者中庸也仲尼祖述堯舜以下仲尼之行也所行者皆中庸也中和之論發於子思中庸之論本於仲尼然發而中節之和即是時中之中子思中和二字亦只是說仲尼一中字故曰中庸之中兼中和之義而章句必先曰無偏無倚而後曰無過不及可謂精矣

君子之中庸也君子而時中小人之中庸也小人而無忌憚也

王肅本作小人之反中庸也程子亦以為然今從之

○君子之所以為中庸者以其有君子之德而又能隨時以處中也小人之所以反中庸者以其有小人之心而又無所忌憚也蓋中無定體隨時而在是乃平常之理也君子知其在我故能戒謹不睹恐懼不聞而無時不中小人不知有此則肆欲妄行而無所忌憚矣

語錄為善者君子之德為惡者小人之心君子而處不得中者有之小人而不至於無忌憚者亦有之惟其反中庸則方見其無忌憚也○當

看而字既是君子又要時中既是小人又無忌憚○黃氏曰而又能三字而今看極是得力○饒氏曰此章云君子之中庸也君子而時中後章又說用中言

中而不及庸何也蓋庸不在中之外惟其隨時取中所以可常行而不可易此兩句君子小人互說君子說時中便見小人不時中小人說無忌憚便見君子有忌憚○通曰章句於首章曰性之德此曰君子之德蓋所以為君子之德者不過能存其性之德而已君子而時中者未發時戒慎恐懼已是有君子之德及其發也又能隨時以取中小人者終日膠膠擾擾政自不見其有未發時此心已是小人之心而又肆無忌憚戒慎恐懼是君子畏天命無忌憚是小人不知天命而不畏章句所謂在我者即首章所謂無一不本於天而備於我者君子知其在我者戒慎恐懼而無時不中即首章所謂學者知此則其用力自不能已也觀章句於此兩章無異意可見子思之意與夫子本無異也

## 右第二章

此下十章皆論中庸以釋首章之義文雖不屬而意實相承也變和言庸者游氏曰以性

情言之則曰中和以德行言之則曰中庸是

也然中庸之中實兼中和之義

黃氏曰性情天生底德行

人做底性情人人一般德行人人不同○通曰此說中庸分君子小人首章說中和只歸之君子蓋君子有主敬之功故能因其性情之自然者推而極之小人無主敬之功故德行惟君子為能小人則反是

子曰中庸其至矣乎民鮮能久矣

鮮上聲下同

過則失中不及則未至故惟中庸之德為至然亦人所同得初無難事但世教衰民不興行故鮮能之今

已久矣論語無能字

語錄民鮮能久緣下文有不能

於其道之久細考兩章相去甚遠自不相蒙亦只合  
依論語說○仁壽李氏曰有周之末先王之跡未遠  
聖人猶有久矣之歎况後聖人又千百年者乎雖然  
自物則言之則過與不及皆不可以言至自末世言  
之則過乎則者少不及乎則者多學者試以事君之  
敬事父之孝與人交之信反已而自省焉則其至與  
否可見矣○江陵項氏曰民鮮能久矣言人之不能  
知不能行也下章曰道之不行言非不能行由於不  
能知也道之不明言非不能知由於不能行也○饒  
氏曰此章明中庸之道非特小人反之而眾人亦鮮

能之以起下章之意○通曰此章比論語去之為德也四字添一能字章句謂世教衰所以民鮮能饒氏謂民氣質自偏故鮮能愚謂氣之偏故不能知質之偏故不能行世教又衰無以矯其氣質之偏使之能知能行然子思引論語之言添一能字須看下章許多能字方見子思之意鮮能知味是不能知者不能菴月守是不能行者中庸不可能言非義精仁熟者不能知不能行惟聖者能之是專言聖人知之盡仁之至故獨能知能行至於人一能之已百之人十能之已千之果能此道矣雖愚必明雖柔必強是愚者本不能知能百倍其功則能知柔者本不能行能百倍其功則能行後而至誠能盡其性是能知之盡能行之至唯至聖為能聰明睿知是能知能寬裕溫柔以下是能行惟至誠為能經綸天下之大經是能行非聰明聖知達天德者孰能知之又說能知看許多能字則子思此章添一能字固有旨哉

右第三章

子曰道之不行也我知之矣知者過之愚者不及也道  
之不明也我知之矣賢者過之不肖者不及也

知者之  
知去聲

道者天理之當然中而已矣

通曰只是一道字首章  
釋道也者曰道者事物

當然之理皆性之德而具於心為下文不可須臾離  
而言也此章釋道字曰道者天理之當然中而已矣  
為下文過不及而言也然事物當然之理即是天理  
之當然性之德而具於心亦中而已矣特具於心者  
是無偏無倚之中此是無過  
不及之中章句錙銖不差也知愚賢不肖之過不及  
則生稟之異而失其中也知者知之過既以道為不

足行愚者不及知又不知所以行此道之所以常不行也賢者行之過既以道為不足知不肖者不及行

又不求所以知此道之所以常不明也

北山陳氏曰世之高明洞

達識見絕人者其持論常高其視薄物細故若將澆馬則必不屑為中庸之行如老佛之徒本知者也求以達理而反滅人類非過乎至於昏迷淺陋之人則又蔽於一曲而暗於大理是又不及矣二者皆不能行道世之刻意厲行勇於有為者其操行常高其視流俗汙世若將澆焉則必不復求知於中庸之理如晨門荷蓀之徒本賢者也果於潔身而反亂大倫非過乎至於闡葦卑汙之人則又安於故常而溺於物欲是又不及矣二者皆不能明道○饒氏曰此章專以過不及為言似言中而不及庸蓋中即所以為庸



非有二也。或問：愚者不及知，此中不肖者不及行，此中費隱章又云：夫婦之愚不肖，可以與知能行，何也？曰：彼以夫婦一事言此，以道之全體言。問：賢合屬行，知合屬明，而夫子却交互說者，何故？曰：如此則入皆曉得，夫子何以曰：我知之矣。緣天下人都不知此夫子所以有此歎行，不是說人去行道，是說道自流行於天下，明不是說人自知道，是說道自著明於天下。人多差看了，須要見得知行相因。○黃氏曰：賢與知，人品之高者也。一有過焉，亦無異於愚不肖矣。聖賢衛道之嚴，所以勉夫人以大中之道者此也。○新安王氏曰：自世俗觀之，過疑勝於不及，自道言之，其不合於中庸則一。子路過於勇，子貢過於辨，子張過於莊，至於曾皙牧皮之狂，往往皆失之過。夫子每每抑之，欲其反而就中也。○通曰：道至中而止，纔過之便不是。中便易流於異端。程子曰：道不行，百世無善治。學不傳，千載無真儒。子思此章分道之不行，不明

而下章即舜之知言道之所以行即回之賢言道之所以明即此意也道不明則學不傳故朱子曰中庸一書子思憂道學之失其傳而作也兼後面欲說知仁勇此章又為此三者發端而言知者知之過以道為不足行不仁也賢者行之過以道為不足知不知也愚不肖者安於不及不能勉而進不勇也

人莫不飲食也鮮能知味也

道不可離人自不察是以有過不及之弊

語錄飲食譬日用味

譬理○通曰前分兩股互言知行此獨曰鮮能知蓋道貴乎能知能行然能行又未有不先於能知者也

右第四章

子曰道其不行矣夫

夫音扶

由不明故不行

陳氏曰人之所以不能行道者以其不能知道也

### 右第五章

此章承上章而舉其不行之端以起下章之

意

通曰前章民鮮能是兼知行言鮮能知味專指知而言故此章承上文而言曰道其

不行矣夫又專指行而言

子曰舜其大知也與舜好問而好察邇言隱惡而揚善執其兩端用其中於民其斯以為舜乎

知去聲與平聲好去聲

舜之所以為大知者以其不自用而取諸人也邇言

者淺近之言猶必察焉其無遺善可知

語錄舜本自知又能合天

下之知為一人之知而不自用其知此其知之所以愈大也若只據一己所有便有窮盡○通言淺近之言猶所謂尋常言語人之所忽而舜好察之非洞見道體無精粗差別不能然也孟子曰自耕稼陶漁以至為帝無非取諸人者又曰聞一善言見一善行若決江河沛然莫之能禦此皆好察通言之實也伊川先生曰造道深後雖聞常人言語至淺近事莫非義理

然於其言之未善者則

隱而不宣其善者則播而不匿其廣大光明又如此

則人孰不樂告以善哉

語錄言之善者播揚之不善者隱而不宣則善者愈樂告

以善而不善者亦無所愧而不惜言也其求善之心廣大光明如此人安得不盡以其言來告而吾亦安

有不盡聞  
之言乎

兩端謂衆論不同之極致蓋凡物皆有兩

端如小大厚薄之類於善之中又執其兩端而量度

徒洛

以取中然後用之則其擇之審而行之至矣然

非在我之權度精切不差何以與去此此知之所以

無過不及而道之所以行也

語錄問擇字舜分上莫使不得否曰好問好察

執其兩端豈不是擇聖人生知安行只是行得較容易○兩端只是起止二字猶云起這頭至那頭也自極厚以至極薄極大以至極小極重以至極輕於厚薄大小輕重之中擇其說之是者而用之乃所謂中若但以極厚極薄為兩端而中摺其中間以為中則是子莫執中而已中間如何見得是中蓋極厚者說

得是則用極厚之說極薄之說是則用極薄之說厚薄之中是則用厚薄之中之說至於輕重小大莫不皆然蓋惟其說之是者用之不是察其兩端不用而但取兩端之中者用之也若去其兩頭而只取中間則或這頭重那頭輕這頭偏多那頭偏少是乃所謂不中矣或曰孔子所謂兩端與此同否曰竭其兩端是自精至粗自大至小自上至下都與他說無一毫之不盡舜之執兩端是取之於人者自精至粗自大至小總括以盡無一善之或遺又問所謂衆論不同都是善一邊底曰惡底已自隱而不宣了○葉氏曰兩端非如世俗說是非兩端善惡兩端之謂乃是事已是而非非事已善而非惡已皆當為之事自斯道之不明往往以是非善惡為兩端而執其中則半是非非半善半惡之論興君子不必為十分君子小人不必為十分小人苟且酌中之習乃鄉原賊德之尤也可不辨哉○饒氏曰執是執其言用亦是用其言

也執其兩端則有以見其寬弘博大兼總衆善而無遺用其中則有以見其精密詳審極於至當而無偏此所以異於他人也○通曰知仁勇學者入德之事下章回之仁子路之勇皆學者事大舜之知自是聖人事姑借以為言耳故章句於回與由則曰擇曰守於舜則曰擇之審而行之至不以守言也然此章政是學者用力之始政當以聖人自期況舜之所謂大知者不過取諸人以為善爾方其有取於衆人之言也不主一人而惟擇其善者揚之及其有取於衆言之善也又不主一說而惟擇其合乎中者而用之執兩端是不主於一用中是卒用其一擇之審舜之精也行之至舜之一也此所以為舜之中也顏淵曰舜何人也予何人也為者亦若是此章言舜而下章言回學者政好將顏淵之語通看此二章

## 右第六章

子曰人皆曰予知驅而納諸罟獲陷阱之中而莫之知

辟也人皆曰予知擇乎中庸而不能期月守也

予知之知去聲

罟音古獲胡化反阱才性反辟避同期居之反

罟網也獲機檻也陷阱坑坎也皆所以擒取禽獸者也擇乎中庸辨別衆理以求所謂中庸即上章好問用中之事也期月匝一月也言知禍而不知辟以況

能擇而不能守皆不得為知也

葉氏曰罟獲陷阱人皆知其為掩捕而設

而不能避之此殆借此以興起能擇中庸而不能不變於旬月之後者也○仁壽李氏曰此因上章之大



知而言衆人之不知也中不可不擇又不可不守擇而不守終非己物既能擇之又能守之然後可以言知夫子嘗因仁以言知矣擇不處仁焉得知擇而不處謂之知不可矣孟子嘗因仁義以言知矣曰知之實知斯二者弗去是也知而去之謂之知不可也夫子之所謂處孟子之所謂弗去中庸之所謂守其義一也○饒氏曰知屬貞貞者正而固正固二字方訓得貞字知得雖是正了仍舊要固守所以說貞者事之幹又曰分而言之則知能擇仁能守合而言之則擇固謂之知然能擇而不能守亦不得謂之知此章雖引起下章仁能守之說然仍舊重在知字

### 右第七章

承上章大知而言又舉不明之端以起下章

也

通曰上章言舜本自大知不自以為知而卒成其知此章言人本自不知自以為知

而卒成不知此兩人字蓋借知禍而不知避之人以況能擇而不能守之人也上章舜聖人下章回賢人此章兩人字衆人也上章舜能擇為知下章回能守為仁此章結上章之所謂知起下章之所謂仁

子曰回之為人也擇乎中庸得一善則拳拳服膺而勿失之矣

回孔子弟子顏淵名拳拳奉持之貌服猶着也膺曾也奉持而着之心宵之間言能守也顏子蓋真知之

故能擇能守如此行之所以無過不及而道之所

以明也

永嘉陳氏曰回擇乎中庸能體認之也體認得分明則得其固有之善如失其故物而得

之敬而守之如恐不及肯失之乎○饒氏曰拳拳服膺而不失每得一善則着之心宵之間而不失不是只守一善亦不是着意去守這一善○通曰擇乎中庸一也擇而不能期月守所謂日月至焉者也擇而得之服膺弗失其心三月不違仁矣日有所得則善愈積而愈多得之不失則善愈存而愈熟舜達而在上擇乎中庸而用之民聖人之道所以行也顏淵窮而在下擇乎中庸而不失於己聖人之學所以傳也子思以回繼舜之後其意深矣

## 右第八章

子曰天下國家可均也爵祿可辭也白刃可蹈也中庸不可能也

均平治也三者亦知仁勇之事天下之至難也然不必其合於中庸則質之近似者皆能以力為之若中庸則雖不必皆如三者之難然非義精仁熟而無一毫人欲之私者不能及也三者難而易中庸易而難

此民之所以鮮能也

方氏曰中庸便只在三事上非別有一箇道理在三事之外只

三者做得合義中節便是中庸○長樂陳氏曰天下國家可均此知者能之第恐作聰明而非中庸耳爵

祿可辭此廉者能之第恐務沽激而非中庸耳白刃可蹈此勇者能之第恐輕死生而非中庸耳○通曰即論語中如管仲一匡天下天下國家可均也如晨門荷蓀之徒爵祿可辭也如召忽死於公子糾之難白刃可蹈也然夫子則以為民鮮能於中庸久矣蓋深歎夫中庸之不可能也中庸雖若不可能亦不過平常之理人自鮮能知味人自不能期月守故曰惟聖者能之饒氏謂章句言義精仁熟似欠勇字意竊謂擇之審者義精也行之至者仁熟也不賴勇而裕如者也學者於義必精之於仁必熟之便是知仁中之勇故章句於此章釋中庸之不可能曰非義精仁熟無一毫人欲之私者不能及於下章言勇處則曰此則所謂中庸之不可能者非有以自勝其人欲之私者不能擇而守之反覆細玩朱子之意可見矣章句一本曰然皆倚於一偏故資之近而力能勉者皆足以能之一本曰然不必其合於中庸則質之近似者

皆能以力為之蓋曰倚於一偏則就三者之事上說  
曰不必其合於中庸則就人行此三者之事上說後  
本是改  
本分曉

右第九章

亦承上章以起下章

子路問強

子路孔子弟子仲由也子路好勇故問強

子曰南方之強與北方之強與抑而強與

與平聲

抑語辭而汝也

新安王氏曰夫子常患不得中行而與之師堂堂曾喤喤子路行行皆

不合乎中庸夫子於門人一言一藥如子路者當以好勇過我傲之以兼人抑之以不得其死戒之以死而無悔責之然其習氣融釋不盡以強為問則行行之勇猶在也夫子是以設三端問之

寬柔以教不報無道南方之強也君子居之

寬柔以教謂含容巽順以誨人之不及也不報無道謂橫逆之來直受之而不報也南方風氣柔弱故以

含忍之力勝人為強君子之道也

語錄此雖未是義理之強然亦是箇

好人故為君子之事○北山陳氏曰既曰寬柔矣何強之云蓋守其氣質而不變是亦強也○通曰此君子是泛說下文君子和而不流是說成德如論語首章不亦君子乎是說成德與後章君子不重則不威

又是  
泛說

衽金革死而不厭北方之強也而強者居之

衽席也金戈兵之屬革甲冑之屬北方風氣剛勁故

以果敢之力勝人為強強者之事也

北山陳氏曰卧席曰衽○倪氏

曰衽衣衽也金鐵也革皮也聯鐵為鎧甲被之於身如衣衽然故曰衽○饒氏曰陽剛陰柔理之常也南方風氣反柔弱北方風氣反剛勁者陽體剛而用柔陰體柔而用剛如坤至柔而動也剛便見得陰體柔而用剛陽亦然才說風便是用了蓋陽主發生故其用柔陰主肅殺故其用剛○通曰南方之強固皆非中然以含忍勝人為強猶不失為君子之道以果敢勝人不過為強者之事道與事二字自有重輕然南



方豈無果敢者北方豈無能含忍者亦不過舉風氣之大槩而言爾要之氣質之用小學問之功大南北之強氣質之偏也下文四者之強學問之正也

故君子和而不流強哉矯中立而不倚強哉矯國有道不變塞焉強哉矯國無道至死不變強哉矯

此四者汝之所當強也矯強貌詩曰矯矯虎臣是也倚偏著也塞未達也國有道不變未達之所守國無道不變平生之所守也此則所謂中庸之不可能者非有以自勝其人欲之私不能擇而守也君子之強

孰大於是夫子以是告子路者所以抑其血氣之剛

而進之以德義之勇也

語錄和便易流若是中便自不倚何必又說不倚蓋柔弱

底中立則必敬側若能中立不倚方見硬健○和而不流是下惠中立而不倚是夷齊文王善養老他便來歸武王伐紂他又不從而去此便見他中立而不倚處○問此四者勇之事必如此乃能擇中庸而守之乎曰此乃能擇後工夫大知之人無俟乎守只是安行賢者能擇能守無俟乎強勇至此樣資質人則能擇能守後須用如此自勝方能徹首徹尾不失○仁壽李氏曰凡人和而無節或至於同流而合汙惟強者為能和而不徇乎物中者本無所倚或至於力弱而易撓惟強者為能獨立而不懼國有道而富貴或不能不改其平日之素惟強者不變於此身之通塞國無道而貧賤或不能久安乎義命之常惟強者

終身不見是而無悶此非有弘毅之力堅決之見篤  
信天理克盡己私豈能守是四者而勿失然則所謂  
中庸之不可能者此也○饒氏曰四者亦有次第一  
件難似一件中立而不倚難於和而不流國有道不  
變塞又難於上二者國無道至死不變即所謂遯世  
不見知而不悔惟聖者能之此是最難處○永康陳  
氏曰君子之強即曾子之大勇孟子浩然之氣端有  
卓立氣象孟子所謂至大至剛蓋有見乎此○新安  
王氏曰子路為人初無中和氣象故夫子以中和言  
之○通曰第一章自天命率性說中和二字說得大  
此就人之氣質說中和二字說得小流字倚字變字  
皆與強字相反不流不倚不變三不字分明有骨力  
是之謂自強○饒氏曰南北之強是要勝人君子之  
強是要自勝其氣質之偏○通曰南北以勝人為強  
其強也囿於風氣之中君子以自勝為強其強也純  
乎義理而出乎風氣之外此變化氣質之功所以為

大而非禮弗履所以為大者之壯也

右第十章

子曰素隱行怪後世有述焉吾弗為之矣

素按漢書當作索蓋字之誤也索隱行怪言深求隱僻之理而過為詭異之行也然以其足以欺世而盜名故後世或有稱述之者此知之過而不擇乎善行之過而不用其中不當強而強者也聖人豈為之哉

語錄索隱是知者過之行怪是賢者過之○隱僻之理如戰國鄒衍推五德之事後漢識緯之書便是○

北山陳氏曰詭異之行如荀子所謂苟難者於陵仲子申徒狄尾生之徒是也

君子遵道而行半塗而廢吾弗能已矣

導道而行則能擇乎善矣半塗而廢則力之不足也此其知雖足以及之而行有不逮當強而不強者也已止也聖人於此非勉焉而不敢廢蓋至誠無息自

有所不能止也

語錄半塗而廢只為他知處不親切故守得不曾安穩所以半塗而廢若

大知之人一下知了千了萬當所謂吾弗能已者只是見到了自住不得耳○饒氏曰此知足以擇乎中庸而仁不足以守之蓋君子而未仁者也○通曰此章兩君子與上章同此君子亦是泛說下文君子依

乎中庸方  
是說成德

君子依乎中庸遯世不見知而不悔惟聖者能之

不為索隱行怪則依乎中庸而已不能半塗而廢是  
以遯世不見知而不悔也此中庸之成德知之盡仁  
之至不賴勇而裕如者正吾夫子之事而猶不自居

也故曰惟聖者能之而已

語錄此兩句結上文兩節  
意依乎中庸便是吾弗為

之意遯世不見知而不悔便是吾弗能已之意○蔡  
氏曰此再辨知仁勇而總結之索隱之知非君子之  
知行怪之行非君子之仁半塗而廢非君子之勇君  
子之知仁勇則依乎中庸遯世不見知而不悔者是

也○林氏曰觀夫子以隱居放言為我則異於是則知吾弗為之以今汝畫責冉求則知吾弗能已之說○通曰第五章為知仁勇開端則言知者賢者之過愚者不肖者之不及此章結之則言聖者之中庸首尾相應如此兼之前此說鮮能不能不可能此則結之曰惟聖者能之又以見中庸非終不可能也夫子弗為於彼便自弗能已於此即此弗能已處便見非夫子不能夫子自是聖人故不以聖人之能自居學者未至於聖人不可不以聖人之能自期人不知而不愠而夫子曰不亦君子乎避世不見知而不悔而夫子曰惟聖者能之於此互看當有得也

### 右第十一章

子思所引夫子之言以明首章之義者止此

蓋此篇大旨以知仁勇三達德為入道之門  
故於篇首即以大舜顏淵子路之事明之舜  
知也顏淵仁也子路勇也三者廢其一則無


以造道而成德矣餘見第二十章

饒氏曰首章原天命

之性以立言以性無不善無不中也次章而下則以君子小人知愚賢不肖南方北方相形言之以氣質有善有不善有中有不中也惟性無不善無不中故前言戒懼慎獨者所以使人涵養其本然之性情惟氣質有善有不善有中故後言擇守強矯者所以使人變化其未純之氣質知仁勇三者行乎存養省察之中則氣質之偏不能為之累而



一動一靜之間始無適而不得其性情之正  
矣。○通曰自第二章至此大要欲人由知仁  
勇以合乎中知則能知此中仁則能體此中  
勇則能勉而進於此中然夫子於舜之知讚  
之也於回之仁許之也於由之勇抑而進之  
也即此三章觀之夫子之言自無有不合乎  
中者學者所當深體而默識也  
自第二章至此章為第二大節



中庸通卷一